

**COVID-19: Selepas tiga bulan merosot, sektor peruncitan kembali pulih**  
**Astro Awani**  
**19 Ogos 2020**  
**Khairunnisa Kasnoon,**

PETALING JAYA: Selepas mengalami kemerosotan akibat pandemik COVID-19 khususnya pada Mac, April dan Mei lalu, sektor peruncitan kini menunjukkan keadaan kembali pulih.

Menteri di Jabatan Perdana Menteri (Ekonomi) Datuk Seri Mustapa Mohamed memaklumkan, data terkini Persatuan Pengurusan Kompleks pada Julai menunjukkan hampir 95 peratus premis peruncitan kembali beroperasi dengan mencatatkan jumlah pengunjung sehingga 80 peratus.

Mustapa pada masa sama mengakui, penutupan sempadan memberi impak besar kepada pengembangan ekonomi negara.

"Oleh kerana sektor pelancongan masih menghadapi banyak cabaran, maka dalam sektor peruncitan, kita menjangkakan ia akan mengambil sedikit masa untuk mencapai sehingga 100 peratus kembali," katanya.

Beliau ditemui selepas mengadakan tinjauan dan libat urus sektor peruncitan Sunway Pyramid di sini pada Selasa.

Ia bertujuan melihat status terkini pemulihan sektor peruncitan selepas semua sektor ekonomi dibuka pada Jun lalu selaras keputusan Majlis Tindakan Ekonomi (EAC).

EAC yang dipengerusikan Perdana Menteri Tan Sri Muhyiddin Yassin menyarankan pemantauan pemulihan ekonomi negara dilaksanakan di peringkat akar umbi.

Sementara itu, Menteri Perdagangan Dalam Negeri dan Hal Ehwal Pengguna Datuk Alexander Nanta Linggi yang turut hadir berkata, kementeriannya sedang giat menjalankan Kempen Jualan Malaysia dan Beli Barangan Malaysia sehingga Disember ini.

"Tujuan utamanya tak lain tak bukan ialah untuk kita menggerakkan dan merancakkan lagi sektor peruncitan ini, yang merupakan sektor penting dalam ekonomi kita," ujarnya.

Katanya, sejak kempen tersebut dilaksanakan, sebanyak 7,253 cawangan telah memohon untuk menyertai Jualan Malaysia sementara 1,720 cawangan memohon untuk Beli Barangan Malaysia.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/covid-19-selepas-tiga-bulan-merosot-sektor-peruncitan-kembali-pulih-255816>